

եւ եղել է պարզ քնարերգու, սակա՛ւ է երգել Հանրային մտտիւներ:

Միակողմանի քննադատութիւնը եւ հրապարակագրութիւնը յանցանքի մէջ բաժին ունին դրանում: Գրանց տիպիկ ներկայացուցիչն է եղել մեզնում Լէօն: Իր «Ռուսահայոց Գրականութիւնը» աշխատութեան մէջ, օրինակ, նա միայն մի քանի տող է նուիրել Յովհ. Յովհաննիսեանին, սակաւարժէք համարելով նրա ստեղծագործութիւնը, ինչ է թէ՛ վարդ ու դարուն, սէր ու վիշտ է երգել բանաստեղծը, չի արտայայտել Հանրային տրամադրութիւններ: Իսկ անդին՝ նոյն Լէօն էջեր է նուիրել մի Լեոննցի, որովհետեւ նա հակառակ ուղղութեամբ է տողորուած. ոչի՛նչ, եթէ բանաստեղծութեան հետքն անգամ չկայ նրա՝ ոտանաւորով գրուած՝ այդ հրապարակագրութեանց մէջ: Յովհ. Թումանեանի նման մի տաղանդն անգամ՝ շատ աւելի լաւ գնահատութիւն չէ գտել ժամանակին, նոյն հրապարակագիրքննադատների կողմից: Թէեւ տարբեր նշանաբաններով ու անուններով, իրականին մէջ բոլշեւիկ քննադատութիւնը եւս ունի նոյն տեսակէտը:

Յովհաննէս Յովհաննիսեան իր տաղանդով բաւական յետ է մնում, իմ կարծիքով, իր կրտսեր ժամանակակից բանաստեղծներ Յովհաննէս Թումանեանից եւ Աւետիք Բասակեանից, որոնց հետ միասին նա մի տեսակ եռասուղ է կազմում 90-ական թուականների արեւելահայ գրական երկնակամարի վրայ: Վերջին երկուսը ո՛չ միայն աւելի խորը, այլ եւ բազմակողմանի տաղանդի տէր են: Նրանք չափածոյի հետ միասին արտադրել են նաեւ արձակ էջեր: Բայց եւ այնպէս, Յովհաննիսեանին է պատկանում աւագութիւնը, ժամանակագրական տեսակէտով, որպէս քնարերգակ բանաստեղծ: Ժողովրդական տարրը եւս, որ այնչափ շնորհալի կերպով մշակել են Թումանեան եւ Բասակեան, դարձեալ Յովհաննիսեանի կողմից է ուշադրութեան արժանացել սկզբնապէս: Բայց, ի հարկէ, սէրը եւ վիշտը գերակշռող տեղ են գրաւում Յովհաննիսեանի մօտ, որպէս գուտ քնարերգակի:

Իր երիտասարդական տարիների ստեղծագործութեան շարքին են պատկանում, գլխա-

ւորապէս, Յովհաննիսեանի սիրոյ երգերը: Այդ կարգի ոտանաւորների թուում տիպիք է նրա՝ ծանօթ, շատ տարածուած ու երգ դարդած «Ա՛խ, տուէ՛ք ինձ մի քաղցր քուն»ը, որ միեւնոյն ժամանակ արտայայտութիւն է հասարակական տրամադրութիւնների անկման եւ ինքնամփոփման ճիգի՝ սեփական եսի, սեփական զգացումների աշխարհում: Բանաստեղծի փափաքն է՝ «այս կեանքից հեռո՛ւ սլանալ», ընկղմուիլ «քաղցր քունի» մէջ, սաւառնիլ դէպի

Այն աշխարհը, ուր խնդուքիւն, Ուր սէրն է միշտ անթառամ:

Իր շրջապատից ճանճրացած, հասարակական իտէայններից յուսախար՝ բանաստեղծը անձնական վայելքի մէջ է մոռացութիւն որոնում, — այնտեղ, ուր վարդերն իրեն բարձ լինել կարող են, իր վերմակը՝ կանաչից, ուր նա կարող է անվերջ եւ անյազօրէն ծծել նրանց գուարթագին բոյրը, ուր իր առաջ անուշ վտակը կը խոխոջէ խայտալով, չորս բոլորտիքը եղեմային թարմութիւն տարածելով, ուր՝ գարնան մատաղ արեգակը կը ժպտի արշալուսին, գիշերներն էլ գողարիկ, վառ լուսնակը՝ կը խաղայ բանաստեղծի ճակատին: Այդ ամէնի հետ միասին՝

Եւ աչագեղ կոյսն ականջիս
Իւր մեղեդիին մեղմ հնչէ,
Եւ հերարձակ՝ սիրով վզիս
Փարէ քնքուշ, փաղաքշէ...

Եւ այսպէս՝ շարունակ, միշտ եւ անընդհատ.

Եւ յաւիտեան վայելչուքիւն
Գրկէ հոգիս, չյագեմամ...
Ա՛խ, տուէ՛ք ինձ քաղցր մի քուն,
Հեռո՛ւ, հեռո՛ւ սրլանամ:

Նոյն այդ տրամադրութիւնները արտայայտուած ենք գտնում նաեւ բանաստեղծի «Մ-ին», այլ եւ մի շարք ուրիշ ոտանաւորներում:

Եւ սակայն, անցնում են տարիներ, անցնում է բանաստեղծի պատանեկան, վառ երազներով լի կեանքը ու դրա հետ մէկտեղ յօդս են ցնդում այդ երազները, բանաստեղծի անհատական սէրն ու երջանկութիւնը: Գարունին յաջորդում է աշունը, եւ բանաստեղծը անցած